

Ny Valosoa sy hadihady

Fikaonandoham-pirenena

Krivy ara-politika ny fifandiran'ny mpitondra sy ny mpanohitra

Na milaza sy manamafy aza izao fitondrana izao fa tsy misy krivy eto Madagasikara dia tsy ta-kona hafenina ny tranga etsy sy eroa, fa misa-vovona toy ny fako tsy voaroaka ny olana eo amin'ny sehatra rehetra. Na tiana na tsy tiana dia krivy ara-politika ny fifandiran'ny mpanohana ny fitondrana sy ny mpanohitra momba ny « fikaonandoham-pirenena » hamakafakana ny olana rehetra sy ny vahaolana mifanandrify amin'ny singa tsirairay fototr'izany. Na ny Komitin'ny Fampiahavanana ny Malagasy (CFM), ny Fivondronan'ny Fiangonana Kristiana Malagasy (FFKM) sy ny Fiarahamonim-pirenena ary ny Vondrona Iraisam-pirenena, toy ny Vondrona Eropéana aza, dia mamporisika ny hanaovana izany. Ny olana dia ny mpitondra sy ny mpomba azy no miziriziry ny tsy ilàna izany satria efa mandroso hono ny Firenena. Ny azo lazaina dia raha tena mandroso tokoa ny Firenena dia tsy sarotra ny mandresy lahatra ny mpanohitra amin'izany saingy hita sy tsapa, fa mitavozavoza sy tsy maharesy lahatra ny mpomba ny fitondrana eo amin'ny fanaporofoina ny fanamarinana izany. Miakatra an-tsehatra hatramin'ny manam-boninahitra ambony manambara fa tsy ilaina, hono, izany fikaonandoham-pirenena izany fa tokony ifan-tohana ny fampandrosoana. Tsy manaja ny etikan'ny foloalindahy intsony ny manamboninahitra gasy, ka tsy ny fiarovana ny Firenena no imasoana fa maneho hevitra politika noho ny fikatsahana toerana mampisongadin-tena ao anivon'ny fitantanana ny Firenena. Raha ampatsiahivina ny zava-nisy tamin'ny 1991 izay nampivoatra zavatra ihany satria tsy niditra tamin'ny resaka disadisa ara-politika ny Minisitry ny Fiarovam-pirenena tamin'izany fotoana izany, fa nasainy nihiboka tao amin'ny Hotel Panorama ny politisiana ary tsy navelany nivoaka tao raha tsy namoaka fifanarahana niombonana amin'ny fomba nitantanana ny Firenena. Tsy ilaina ihany koa hono izany fikaonandoham-pirenena izany fa tokony hifantoka amin'ny fifidianana ny hatao. Ka na tiana na tsy tiana ihany koa dia ny olana nisy sy noho ny ahiahy, fa tsy ho madio ny fifidianana amin'ny 2023 no antony iray lehibe hanaovna ny fikaonandoham-pirenena. Raha tany Afrika no nisy ireny resaka « doublon » an-tapitrisa ireny dia ho korontana nahatsiravina no nitranga; saingy Hendry ny Malagasy. Ambonin'izany dia mite-

raka ahiahy ihany koa ny fanoloana Sefom-pokontany ataon'ny mpitondra satria mirotsaka amin'izany hatramin'ny depiote izay mandà izany kanefa matoa miditra amin'ny raharaha ny talen'ny kabinetran'ny depiote dia ao raha. Etsy an-kilany dia miteraka disadisa eo anivon'ny foloalindahy ny fampiasana azy ireo amin'ny andraikitra tsy tokony omena azy dia ny famoretana ny olompirenena, tsy mitovy hevitra amin'ny mpitondra, haneho hevitra na dia ao amin'ny taniny mifefy aza. Inoana fa samy tsy te-hihaina amin'izao toe-draharaha misy eto amin'ny Firenena izao, na ny vady aman-janaky ny foloalindahy na ny vahoaka tsy mandady harona na ny vady aman-janaky ny mpanao politika. Saingy matoa ny mpitondra sy ny tandapa miaraka amin'ny ankohonany tsirairay avy miaro tena tsy hikaon-doha hanatsarana ny fiainan'ny besinimaro dia misy zavatra arovany ao. Raha vao idiran'ny resaka politika, na idiran'ny politisiana ny toe-draharaha iray dia miteraka krivy. Porofon'izany ny nidiran'ny filohan'ny Repoblika tamin'ny fihonana ny Tanora Katolika, JMJ, ka nanomezany kit kitapo sy gourde. Na niezaka aza ny tomponandraikitra mpikarakara ny fihonana dia niteraka disadisa teo amin'ny samy katolika izany. Tsy milamina mihitsy ny ao amin'ny Fiangonana Jesosy Mamonjy satria niandany tamin'ny andaniny ny politisiana sy ny manampahefana sasany, ka mahatsiaro ho atao an-kilabao ny ankilany. Fifiadianana no fototry ny olana ka andraikitra ny politisiana niditra tamin'ny raharaha no mampihavina ireo mpifanandrina, satria vao eo anivon'ny fiarahamonina kely iray aza no misy fifanolanana sy fifamonoana dia ho loza no hitranga eto raha toy izany koa no hisy eto amin'ny Firenena. Ny isavorivorianana, hono, hilantoana hoy ny fahendrena malagasy, mitombona ihany koa ny votoatin'ny "materialisma dialektika" izay mizotra amin'ny lalantsaina hoe ao anatin'ny fifanoheran-kevitra no hampisongadina ny hevi-dehibe hampivoatra ny fiainam-pirenena eo amin'ny lafiny rehetra. Ilaina foana ny hevitr'ireo hevitra no madinika (on a toujours besoin d'un plus petit que soit) hoy ny mpanoratra frantsay iray. Tsy mampihetry voninahitra ny manetry tena ary ilaina ihany koa ny hevitra ny vitsy an'isa ety ivelan'ny fitondrana satria hevitra fototry ny demokrasia izany.

Andry Tsiavalona

KOMININA FIIHAONANA FARITRA BONGOLAVA

Maka vola tsy misy Rosia ny delege sy Prefektiora Tsiroanomandidy

Velon-taraina ny vahoaka ao aminy Faritra Bongolova Distrikan'ny Tsiroanomandidy Kominina Fihonana noho ny fakana vola mihoam-pampana ataon'ireo delegem-panjakana sy ny Prefektiora ao Tsiroanomandidy. Tonga nilanja sora-baventy nanoloana ny biraon'ny Kominina ireo Tantsaha nentin'izy ireo nanehoana ny tsindry hazo lena sy fakana vola tsy ara drariny mahazo azy. Handoavan'ny tantsaha vola 3500ar ny omby rehefa maty ary 55.000 ar isaky ny Omby kosa no aloha

amin'ny FIB raha 50.000 ar izany teo aloha, kanefa sady tsy misy Rosia. Ny vola aloha ao aminy prefet indray raha hanao fasana 400.000 ar hatramin'ny 600.000 ar, ny "autorisation" hanaovana Famadihana hondoavana vola fa tsy misy Rosia ary farany ny fanavaozana taratasim-basy tsy misy rosia ihany koa kanefa nakarina 70.000 ar hoy ireto Olona nilanja sora-baventy ireo. Nanamafy ny fijoroana vavolombelona nataon'ireo tantsaha ny ben'ny Tanàna kominina fihao-

nana fa ny Prefet no maniraka ireo delege any aminy Boriborintany hanao io fitakiam-bola tsy misy rosia io satria na dia efa nandefasan'ireo sefo fokotany fitarainana an-tsoratra ny 26 jolay 2022 lasa teo tany amin'ity farany fa tsy nisy ny fepetra mba noraisiny. Efa maro ny tatitra natao tamin'ny prefet fa tsy nisy fandraisana Andraikitra na dia iray aza. Efa nisy hoy ny ben'ny Tanàna ny fitarainana natao tany aminy Ministera ny hanoloana ny prefet tsiroanomandidy sy ny delege Boriborin-

tany kominina Fihonana satria efa tsy rariny loatra ny fakana vola atao amin'ireo Vahoaka, nefa tsy hita hoe alefa aiza izany vola izany. Andrasana izay mety fanazavana ho entin'ny préfet Tsiroanomandidy sy ny delege Boriborintany ao aminy Kaominina fihonana mikasika ity raharaha ity satria samy tsy tao an-toerana izy ireo tamin'ny fotoana nandaloavan'ny mpanao gazety tao Tsiroanomandidy.

Ny Valosoa

Antoko HVM

Hisy ny varavarana hisokatra ho viatrehana ny raharaha politika

Elaela no tsy nandrensampeo loatra ny antoko HVM fa mpikambana vitsivitsy no hita maneho hevitra rehefa misy ny zavatra tsy mety miseho eto amin'ny firenena toy ny filoha nasionaly Rivo Rakotovo. Manoloana izany indrindra dia nisy ny fanambarana mivoaka fa ny antoko HVM dia mikarakara varavarana misokatra ho an'ny Rehetra ho fanokafana ny fiatrehana ny raharaha politika (Rentrée Politique) ny Sabotsy 03 septambra 2022 ho avy izao eny amin'ny foiben-toeran'ny antoko eny amin'ny QG Andraharo im-

meuble près Batimax-Antananarivo, manomboka amin'ny 09 ora maraina. Ireto avy no ho hitanao ao amin'ny fandaharam-potoana araka ny namberan'ny mpikarakara famelabelaran-kevitra arahina adi-hevitra: fampirantiana ny drafitra fisandratan'i Madagasikara sy ireo zavabitan'ny antoko, Fampiofanana sy fifampizarana ho an'ireo Tanora sy Vehivavy ary fandraisana ireo hiditra ho mpikambana vaovao sy fifampizarana ny fianan'ny antoko.

Helisoa

TIM Boriborintany faha 3

Nizara fitaovam-pianarana ho an'ireo ankizy mpianatra

Tsy mijery fotsiny ny fahasahiranana mahazo ireo Ray amandreny sahirana amin'izao fotoana fampidirana mpianatra ankehitriny izao ny depiote voafidy tao amin'ny boriborintany faha 3 Feno Ralambomanana, fa nisy nisy ny hetsika nataony mba hanalàna fahasahiranana azy ireo. Notontosaina ny sabotsy teo tao amin'ny QG Bel'Air ny fizarana kits scolaires ho an'ny taom-pianarana 2022-2023 ho an'ny Fokontany 34 mandrafitra ny Boriborintany faha-3 avy amin'ny Solombavambahoaka Feno Ralambomanana. Ankizy 300 mahery tena sahirana kilasy T1, T2, T3, T4, T5 no nisitraka izany mba hanampiana ireo Ray aman-dReny amin'ny fampidirana ny zanany an-tsekoly.

Helisoa



TONOMALAO

Mpitondra tia mitety tany

Hatreto tsy ahitana vokatry ry zareo mitety tany, Fa ny fahoriam-bahoaka no mitohy hatrany hatrany. Fanalana fanaintainana, tsy mitoetra fa mandalo, Izay no hany tetikadiny noho ny tahotra an-dRavalo !

Ny voandalana mba entiny ary hita ho mitobaka, Dia ronono an-tavy hatrany miampy esona sy kobaka. (Mody hafatratra an-kitapo izay mivolona voasary.) Izay no tena misongadina ary koa mibaribary !

Dia omena vatsy kely ho tampi-maso ny vahoaka, Fa ny saron'ny vilany efa atahorana hipoaka. Avy eo midera tena indray ireo efa tsisy kalitao Fa hoe mijery antsika fatratra, hono, izao tontolo izao !

Mijery antsika Malagasy diso lalana tokoa, Satria ny zava-mahamaika dia ireo tsy mahasoa. Ireo karazan-drendrarendra no hany tena lohalaharana, Ka dia mihemotra hatrany fa tsy misy fivoarana !

Mijery antsika Malagasy tena manam-be an-tanana, Saingy indrisy, saingy indrisy, lavitry ny fiadanana, Fa mpitondra sy ny akama no mampiasa hafetsena, Ka mitavana, manondrana ireo haren'ny firenena !

...Tena tsy ahitana vokatry ry zareo mitety tany, Fa midika ho tampi-maso fananianiam-poana hatrany. Ka dia tsotra anio ny teny avy amin'ny gasy leo sy fay: Mialà fa aza tia mibitaka amin-javatra tsy hay !

TSIMIMALO (23-08-22)

PRIERE AU SACRE CŒUR



Que le Sacré Cœur de Jésus soit loué, adoré et glorifié à travers le monde pour des siècles et des siècles, Amen.

Dites cette prière 6 fois/ jour pendant 9 jours et vos prières seront exaucées même si cela semble impossible. N'oubliez pas de remercier le Sacré Cœur avec promesse de publication quand la faveur sera obtenue. Remerciements au Sacré Cœur pour faveurs obtenues.

Mitantsoa A.